

Vegn l'obligatori da latin tuttina stgassà?

La regenza vul mantegnair vinavant l'obligatori da latin per gimnasiasts che studegian linguas neolatinas

DA MARTIN CABALZAR

■ **Scolars gimnasials dal Grischun che tschernan linguas neolatinas spagnol, franzos, talian e rumantsch sco roms d'accent èn actualmain sfurzads d'emprender latin sco rom complementar. Cun ina incumbensa parlamentara vules deputà Christoph Jaag (ps/Aschera) stgassar quest obligatori. La regenza è cunter.** Damai che l'incumbensa dal deputà socialdemocrat *Christoph Jaag* è vegnida sutscritta dad 83 deputadas e deputads ha ella tuttina anc la schanza da vegnir acceptada en la sessiun dal cussegl grond da l'emna proxima.

Tenor deputà Jaag starmenta quest obligatori da latin d'absolver ils curs da franzos, talian e rumantsch. Uschia sajan s'annunziads a la scola chantunala a Cuir per l'onn da scola 2012/13 mo 13 da 230 scolars per il curs da spagnol. Ils curs da franzos, talian e rumantsch sco roms d'accent na possian insumma betg vegnir realisads, deplorascha Jaag.

Linguas neolatinas vegnan evitadas

Entaifer curt temp hajan scolars, geniturs e magisters che han previs quest effect negativ rimnà passa 2000 sutscripziuns per abolir questa colliaziun obligatorica. Per la gronda part dals signaturs n'è l'obligaziun d'emprender latin betg attractiva e betg moderna. Ella chaschunia in basegn supplementar d'ura da scola e da lavur, restrenschia la pussaivladad da tscherner roms ch'èn averts per tut las autras scolaras ed auters scolars entaifer ils roms d'accent ed ils roms complementars. Quai haja la finala per consequenza ch'ìls roms neolatin vegnian evitads.

Abolir la colliaziun obligatorica

Ils 83 deputads dal cussegl grond che han sutscrit l'incumbensa Jaag na van betg d'accord cun quest svilup che è ina consequenza da la revisiun parziala da la lescha da las scolas medias. Els teman che l'im-



L'aboliziun da l'obligatori da latin al gimnasi vegn a procurar per ina viva discussiun en il cussegl grond.

MAD

purtanza da «l'entira gruppa da linguas neolatinas cun spagnol sco lingua internaziunala e cun la linguas naziunalas franzos, talian e ruamantsch vegnia indeblida» cun la colliaziun obligatorica cun latin, punctuescha Christoph Jaag. Ultra da quai bandunian las scolas medias dal Grischun en quai che riguarda las linguas il context svizzer. Perquai supplitgeschan ils sutsegnaders dall'incumbensa parlamentara che la regenza prendia immediatamain tut las mesiras ch'èn necessarias per annullar questa colliaziun obligatorica.

Mo l'annullaziun da la colliaziun obligatorica cun latin garanteschia la cuntenenziun d'ina purschida adequata da l'instrucziun linguistica en spagnol, franzos e talian a las scolas medias dal Grischun. Cumpareglià cun l'entira Svizra sajan il franzos ed il spagnol colliads obliga-

toricamain cun il latin sulettamain en il Grischun. Tenor l'avis dals deputads consegnonts na duess il Grischun betg ir ina via linguistica speziala e supplementara. La diversità linguistica entaifer il chantun dettia gia avunda lavur, manaja deputà Christoph Jaag. La colliaziun cun il latin na saja insumma betg stringentamain obligatorica per in studi da linguas a l'università.

L'imputanza dal latin na vegnia betg messa en dumonda. Il latin duai vegnir purschì vinavant. Da quai duain profiter cunzunt er scolars e scolaras ch'èn entrads sur la scola secundara en il gimnasi.

Augmentar e garantir la qualidad

Sco la regenza respunda ha il cussegl grond gi concludì 2008 en il rom da la debatta davart la nova lescha da scolas me-

dias da prender mesiras per augmentar la qualidad da l'instrucziun e per garantir quella. Ina da quellas mesiras saja stada quella che scolars che tschernian ina lingua neolatina sco rom d'accent stoppian frequentar obligatoricamain l'instrucziun da latin e stoppian absolver a la fin da la scola media in examen en latin. En quest connex saja vegnì lantscha per l'onn da scola 2012/13 in experiment da scola cun latin sco rom complementar.

Tge di la statistica?

Che las linguas neolatinas vegnian tschernidas main savens sco rom d'accent perquai ch'ellas sajan colliadas obligatoricamain cun latin, sco quai che Christoph Jaag pretenda, na possia betg vegnir confermà cleramain cun las datas registradas en l'emprim rapport intermediar. L'onn

da scola current frequentan 202 scolars ina quarta classa a la scola chantunala. 15 da quels han tschernì spagnol sco rom d'accent. En cumparegliaziun cun ils dus ultims onns (senza obligatori da latin) n'è il dumber da scolars che han tschernì spagnol sco rom d'accent betg sa reduci sur la media. En las 5avlas classes gimnasialas sajan quai 20 da 191 scolars ed en las 6avlas classes 16 da 209. Franzos hajan memia paucs scolars da la 4. classa tschernì sco rom d'accent uschia ch'il rom vegn betg pli purschì quest onn da scola. L'onn da scola passà ha mo ina scolara tschernì franzos sco rom d'accent, l'onn precedent eran quai stads 16 scolars. Rumantsch e talian na sajan betg pli vegnids absolvids sco roms d'accent ils ultims 3 onns a la scola chantunala, constatescha la regenza.

Sumegliantamain sa preschentia la situaziun en las scolas medias privatas. Ad Aschera frequentan l'onn da scola current 8 da var 70 scolars las quartas classes spagnol sco rom d'accent. En las 5avlas gimnasialas sajan quai 7 da 75 scolars ed en las 6avlas classes 17 da radund 100 scolars.

La regenza refusa l'incumbensa

La regenza è cunter l'interruptziun anticipada da l'experiment da scola che è dal reminent era vegnì acceptà da la cumissiun svizra da maturità. Pir l'evaluaziun finala da l'experiment da scola vegnia a mussar sche la colliaziun obligatorica cun latin sa cumprovia sco mesira per augmentar la qualidad da la scolaziun en il gimnasi. Intginas universitads, cunzunt quellas da Turitg, Losanna, Genevera e Neuchâtel, permettian ultra da quai enconuschientschas cumprovadas dal latin per il studi d'ina lingua neolatina. «Ils gimnasiasts grischuns duain avair er vinavant la pussaivladad da s'acquistar las enconuschientschas da latin ch'èn necessarias per il studi d'ina lingua neolatina gia en il rom da lur scolaziun da maturità», scriva la regenza. Perquai popona ella da refusar l'incumbensa.